

**19 FEBRUARIE**

**ACATISTUL  
SF. CUVIOS  
TEODOR I UȘAKOV  
DE LA  
SANAKSAR**



**ACATISTIERUL PE FEBRUARIE-RU**





## АКАФИСТ



*Про икону преподобного Феодора Санакарского в восточной части святой мощей ми рассказали у полерединому выпуску. Там же вложено фотоматериал,*



*Зроблений в день прибытия иконы до Киева, та житие святого подвижника Шапер, як і обіцали, вмістимо акафіст преподобному Феодору Санакарському*

**Кондак 1**

Избранный угодниче и добрый воине Царя Небеснаго, заповедей Евангельских изрядный делателю, всех, прибегающих к тебе, ко спасению наставниче, смирением велие дерзновение стяжавый ко Господу, выну моли о нас, недостойных чадах твоих, да зовем ти: Радуйся, преподобне Феодоре, стада Христова пастырю богомудрый.

**Икос 1**

Ангельское житие твое провидя и многих ко спасению привести имущаго, от юности избрав тя Христос в жилище Себе, дарами многими почтил еси; мы же, прославляя тя прославльшаго, бранными устами вопием ти:

Радуйся, в разум истины пришедый,  
Радуйся, яко врага и все страсти одолел еси;  
Радуйся, яко звание учительства от Господа приял еси,  
Радуйся, яко научил еси нас спасения пути;  
Радуйся, все злострадания кротко претерпевый,  
Радуйся, яко данный тебе талант сторицею преумножил еси;  
Радуйся, преподобне Феодоре, стада Христова пастырю богомудрый.

**Кондак 2**

Видев печальный конец плотскаго жития, и безчинныя утехи мирския в смертоносный яд вменив, вразумившему тя Господу взывал еси: Аллилуия.

**Икос 2**

Разум божественный желая стяжати, вся земная во уметы вменил еси, да бесценный бисер — Христа приобрящещи. Тем же пустынное житие избрал еси, сего ради вопием ти:

Радуйся, человеческия пристрастия отринувый,  
Радуйся, безстрастия возжелевый;  
Радуйся, своеволие оставивый,

Радуйся, плотоугодие возненавидевый;  
Радуйся, яко немощную плоть духом победил еси,  
Радуйся яко вместо земнаго веселия небесное стяжал еси;  
Радуйся, преподобне Феодоре, стада Христова пастырю богомудрый.

**Кондак 3**

Силою Божиею укрепляем, велия подвиги подъял еси; покаяние началом положив, плоть непрестанно озлоблял еси, и все упование на Господа возложив, вопиял еси Ему: Аллилуия.

**Икос 3**

Имея нрав незлобивый и сердце милующее, неразумным гонителям твоим вся обиды прощал еси, наипаче умолял еси от возлюбленной ты пустыни не отлучати, тем же видяще таковое твое во юности преуспеяние, восхваляем ти:

Радуйся, кроткий пустынножителю,  
Радуйся, от юности непредестный подвижнике;  
Радуйся, от демонов ненавидимый,  
Радуйся, за Христа поношения претерпевый;  
Радуйся, все упование на Господа возложивый,  
Радуйся, в вере своей не посрамивыйся;  
Радуйся, преподобне Феодоре, стада Христова пастырю богомудрый.

**Кондак 4**

Буря безбожия и противных ветров воста тогда на Русь святую, не бе места во обителех истинным рабом Христовым, сего ради и ты странствия и скитания подъял еси, обаче на всяком месте возлюбленному Богу вопиял: Аллилуия.

**Икос 4**

Слышав повеление Спасителево, не отвратился еси воздати кесарево кесарю, и пред-



## АКАФИСТ



став на суд мира сего, вспять не обратился еси, тем же ублажаем твердость твою, зывающе:

Радуйся, любовь к миру до конца умертвивый;  
 Радуйся, яко вся земная презрел еси;  
 Радуйся, вышняго Царя паче земнаго убоявыйся,  
 Радуйся, славы суетной не восхотевый;  
 Радуйся, несмущенной твердостию царю удививый,  
 Радуйся, верою крепкою суд на милость предложивый;  
 Радуйся, преподобне Феодоре, стада Христова пастырю богомудрый.

**Кондак 5**

Боготечною звездою возсиял еси в столице северной, темный запад унылаго жития благочестием своим озарив, и научая собою Просветителю душ вопити: Аллилуия.

**Икос 5**

Видя себе ко Ангельскому чину причтена, Бога восхвалял еси, вся благая желанья исполняющего; чада спасения же в тебе истиннаго отца и пастыря обретоша, с ними же и мы поем таковая:

Радуйся, чистым житием к себе души привлекавый,  
 Радуйся, постничеством всех удивлявый;  
 Радуйся, яко обеты иноческия строго соблюл еси,  
 Радуйся, яко непрестанную молитву возделал еси;  
 Радуйся, в разсуждении Златоусту подобник быв,  
 Радуйся, яко свыше дар врачевания душ приял еси;  
 Радуйся, преподобне Феодоре, стада Христова пастырю богомудрый.

**Кондак 6**

Проповедника боговещаннаго тя видя, и стадо овец Христовых окрест тебе умножающее, паки воста на тя завистник древний, злобу и клевету во уста недостойныя вложив; ты же, провидя козни его, Подателю благосердия пел еси: Аллилуия.

**Икос 6**

Возсия свет радости в души твоей, егда место гневу не дав, псаломски в пустыне Саровстей водворился еси, обаче и паству твою на тучныя пажити монашеского жителства привел еси, с нею же ликующе, и мы рцем:•

Радуйся, говителям мщениа не давай,  
 Радуйся, смирением их победивый;  
 Радуйся, яко словопрений удалялся еси,  
 Радуйся, среди житейския молвы пустыннаго духа не угасивый;  
 Радуйся, шумом мира тяготивыйся,  
 Радуйся, яко горлицей пустыннолюбной из него воспарил еси;  
 Радуйся, преподобне Феодоре, стада Христова пастырю богомудрый.

**Кондак 7**

Хотя Человеколюбец Господь воинство иноков преумножити, и чрез тя сие ко спасению привести, из славнаго Сарова в тишину Санаксара пресели тя, и тамо, яко светильник горяй и светяй, на свещнице ты постави, со чады поющаго: Аллилуия.

**Икос 7**

Новое и дивное явление зрим на месте сем, видяще тя, яко единаго от древних, лучами святости сияющего, среди дремучих лесов обитель святую, яко град велик, воздвизающего; тем же зело удивляеми, благодарно воспоем ти:

Радуйся, воли Божией усердный исполнитель,  
 Радуйся, всякое послушание от Него радостно приемлющий;  
 Радуйся, великаго труда не убоявыйся,  
 Радуйся, всю надежду на Щедродавца возложивый;  
 Радуйся, место сие молитвами своими освятивый,  
 Радуйся, потом и слезами сие удобривый;  
 Радуйся, преподобне Феодоре, стада Христова пастырю богомудрый.

**Кондак 8**

Странное чудо и боголепное зрится, яко в немногих летех храм велик во славу Пречистыя созидается, и обитель иночествующих, древ-



## АКАФИСТ



ним подобная, твоими трудами укрепляется, в ней же монаси мнози Строителю спасения единым гласом вопиют: Аллилуия.

**Икос 8**

Весь закон, яже по Бозе жития, явлен тебе имея, наставник искусный и предивный был еси, вражия коварства и хитрости мглу, яко луч солнечный, разсеял еси, тем же по достоинию слышиши:

Радуйся, бесов прогонителю,  
Радуйся, страстей искоренителю;  
Радуйся, иноческого общежития устроителю,  
Радуйся, церковного благолепия ревнителю;  
Радуйся, исцелявый прощением,  
Радуйся, врачевавый терпением;  
Радуйся, преподобне Феодоре, стада Христова пастырю богомудрый.

**Кондак 9**

Всякую неправость в себе искоренивый, тщался еси и ближнему сие благо доставити, сего ради неустанно трудился еси, наставляя, обличая и запреща; льстивое же чадо твое, не терпя отеческих прещений, оклевета тя пред сильными мира сего, не ведуще пети: Аллилуия.

**Икос 9**

Витийства сугубаго не достанет, во еже сказати терпение твое скорбей многих, егда в заточении многолетнем во обители Соловецтей пребывал еси; мы же ныне, яко же и чада твоя тогда, со слезами взываем:

Радуйся, яко человекоугодие презрел еси,  
Радуйся, яко безчинных строгостию исправлял еси;  
Радуйся, Давидски гонения терпевый,  
Радуйся, скорби в небесный дар вменявый;  
Радуйся, выну к Богу духом горевый,  
Радуйся, яко и Бог с тобою пребыл еси;  
Радуйся, преподобне Феодоре, стада Христова пастырю богомудрый.

**Кондак 10**

Спаси хотя верных множества, Великий Началопастырь многими дарами обогати ты, ег-

да, яко злато, огнем страданий очищена паки в родную обитель возврати, яже узрет ты, светом ангелоподобнаго лика твоего озарися, радостно воспеваает Праведному Воздаятелю: Аллилуия.

**Икос 10**

Стеною несокрушимою православным явился еси, пламенными молитвами лукавья души попяляя, трезвыми советами от заблуждения ограждая, божественною любовию сердца согревая; всем быв вся, многих спасл еси, сего ради прими хвалы сия:

Радуйся, на крест радостно восшедый,  
Радуйся, на кресте не роптавый;  
Радуйся, распятием сим до конца ветхая в себе умертвивый,  
Радуйся, яко в страдании ум к Богу возводил еси;  
Радуйся, яко непрестанно горю сердце имел еси,  
Радуйся, земный ангеле и небесный чловеке;  
Радуйся, преподобне Феодоре, стада Христова пастырю богомудрый.

**Кондак 11**

Пение всякое побеждается, егда восхощет воспети многочисленныя подвиги твои: всенощныя бдения, непрестанная пощения, слез излияния, болезней и теснот благодушное терпение, яже во все время жития твоего, яко дар должный Всевышнему приносил еси, тем же и сподобился от Него со Ангелы пети: Аллилуия.

**Икос 11**

Светозарный светильник старчества благодатнаго явился еси во времена мрачныя забвения, и благоуханное цветение его провозвестил еси житием своим, да не увянет цвет духовный в Российской земли; ныне же на небесех живяй от земных прими песнь сию:

Радуйся, умнаго делания подвижнице,  
Радуйся, любве чистыя приятелище;  
Радуйся, Евангельской мудрости вместилице,  
Радуйся, яко паче своя, пользы ближних искал еси;  
Радуйся, яко добрым виноградарем явился еси,



## АКАФИСТ



Радуйся, яко ни едину же розгу презрел еси;

Радуйся, преподобне Феодоре, стада Христова пастырю богомудрый.

### Кондак 12

Благодать Божию яви нам, недостойным, в последняя времена мощи твоя святая, ими же обитель твою от кощянаго разорения сохранил еси, наипаче же к новой жизни возродил еси, тем же и ныне умоли за ны, чада твои, да не явимся неблагодарни за толикую милость к нам, и нерадению да не предадимся, обаче да усердно восплеваем Богу: Аллилуия.

### Икос 12

Поюще равноангельное и многоскорбное твое житие, восхваляюще благодать Божию, до конца нас не оставившую и за грехи не презревшую, зрим убо наше убожество и скудость во еже воспети тя по достоянию, обаче не отираться певия сего:

Радуйся, оставляяи согрешающему,  
Радуйся, небрежное житие обличавый;  
Радуйся, в Боге утешение имевый,  
Радуйся, яко о миролюбцах рыдал еси;  
Радуйся, монашества крепость неборимая,  
Радуйся, священства украшение;  
Радуйся, преподобне Феодоре, стада Христова пастырю богомудрый.

### Кондак 13

О, священная главо! Богоносне отче наш Феодоре, славу преподобных и венец исповедни-

ков стяжавый, и в незаходимей сияющий славе! Яко же прежде, тако и ныне не забуди стадо твое, но управи е к вечному спасению, зовущее о тебе Богу: Аллилуия.  
(Сей кондак читать трижды)

### Икос 1

Ангельское житие твое провидя и многих ко спасению привести имущаго, от юности избрав тя Христос в жилище Себе, дарами многими почтил еси; мы же, прославляя тя прославльшаго, бренными устнами воцнем ти:

Радуйся, в разум истины пришедый,  
Радуйся, яко врага и все страсти одолев еси;  
Радуйся, яко звание учительства от Господа приял еси,  
Радуйся, яко научил еси нас спасения пути;  
Радуйся, все злострадания кротко претерпевый,  
Радуйся, яко данный тебе талант сторицею преумножил еси;  
Радуйся, преподобне Феодоре, стада Христова пастырю богомудрый.

### Кондак 1

Избранный угодниче и добрый воине Царя Небеснаго, заповедей Евангельских изрядный делателю, всех, прибегающих к тебе, ко спасению наставниче, смиреннем велие дерзновение стяжавый ко Господу, выну моли о нас, недостойных чадех твоих, да зовем ти:  
Радуйся, преподобне Феодоре, стада Христова пастырю богомудрый.

## МОЛИТВА

О, радости наша! Пастырю наш, преподобне отче Феодоре! Воздыхаем из глубины сердца нашего и со слезами вопием ти: видиши наше неможение, во мраке страстей пребывание, сил душевных расслабление, своеволием обдержание, плотоугодием пленение и от всякия добродетели обнищание! Видь плач и недоумение наше! Вразуми ны и настави на спасения стези, испроси нам у Великодаровитаго Бога нищеты наша познание, слезное покаяние, нелицемерное смирение и в молитве непрестанное терпение, да сими благодать Его к себе приклоним ко прощению грехов, и сподобимся с тобою вечно пребывать во Царствии Небеснем, поя и благословя Всесвятую Троицу: Отца, и Сына, и Святаго Духа, ныне и присно, и во веки веков. Аминь.